



## 後生

後生真好！佢一步做人兩步行，三尺溝，佢搖下斯過，溝闊溝深，對佢來講斯像過戶檻个樣，佢毋驚頓著也毋驚骨頭會毋聽講，後生係吾个本錢。哼哼跳个佢，上下梯礮自從毋識寬寬跋、定定行。上梯兩礮做一脚行，落梯斯像電動遊戲肚个「瑪莉歐」，一跳斯三礮，麼个係腳撓著、踎著，離佢天隔遠——後生係吾个後撐！

佢頭昂昂，身胚挺挺，儘採著斯儘採靚。律律不不个衫褲著在吾圍身，係品味也係個人風格，無人敢嫌也無人會講「嫋」。烏金个頭那毛，在日頭下晟都路人目珠擘毋開。好搞个年紀，佢將頭那毛染去五花六色，長毛短毛做下拿來做試驗，仰脣掇仰脣好看，後生有特權，特權下背斯一隻字「靚」。

細漢時節番綻蠻皮，爺哀輒輒會講：「皮，同佢弓較纏兜！」係呀，單淨後生正有權利皮弓纏，毋使膏粉打扮，自然个皮膚金頭，斯像日頭下个大紅花錫來蜂蝶流連，眾人个目珠黏在吾圍身，人毋係靚也有靚个光彩！跔緊歲數增加，莫講面皮打摺，歸身皮膚个皺痕乜緊來緊多，緊來緊深，金頭不再个皮膚，用較好个化妝品，還係換毋來後生个光、亮，後生實在好！

後生个佢，骨頭硬程，腳筋硬程，跋山、遶寮、遶街路，三日三夜毋會恹、毋知瘡，麼个保健保養品，佢鼻鼾鼾，這下个佢當做係笑話。電力灌飽飽，日日躁躁轉，逐樣美食佢都想嚐下看，試下哩，刺激冒險个活動，佢又驚又好，無傷到歸身疤了了，毋會收山。這下个佢，用一到到个傷，一擺擺个疾，累積精彩个人生經驗，這斯係後生个生命。

後生个佢，係一臺正收撇落地架个飛行機。頭昂昂，佢一心航向寬闊个白雲青天，目標確定，方向盤抓纏，續落來會堵著仰脣个狀況，結局來交分天公。放心飛，大膽行，佢催油過催油，吾个人生正愛起勢呢！

作者：劉玉蕉

### ☆詞彙學習☆

【搖】chug`：搖晃器物於容器中上下跳動，引申為輕而易舉跳過。

【戶檻】fu` kiam+：門檻，門下的橫木。

【哼哼跳】bud` bud` tiauh`：形容活力充沛，動個不停。

【五花六色】ng` fa+ liug` sed`：五顏六色。

【金頭】gim+ teu`：亮光、光澤。

【後撐】heu` cang`：靠山。

【歸身】gui+ shin+：全身。

【收山】shiu+ san+：結束、完畢。

【續落來】sua` log` loi`：接下來。

### ☆文法學習☆

【較……】因音讀而有不同意思。以「較好」為例，音 ka+ ho`是「比較好」，此時的「較」為「比較、更甚於」之意；若音為 ka` ho`，則是「再怎麼好」，此時的「較」層次比讀陰平調時更高些，是「再怎麼」之意。另外還有 gau`音，如「比較」；gau`音，如「計較」。

例 1：今晡比昨晡較寒。（今天比昨天要冷。）

例 2：較寒个天時，佢乜著短袖。（再怎麼冷的天氣，他也穿短袖。）